

KS2023 erat hubungan masyarakat

Keretapi Sarong bertemakan etnik semarak sambutan Hari Malaysia

Oleh Ercy Gracella Ajos
bhnews@bh.com.my

Kuala Lumpur: Orang ramai dijemput memeriahkan 'flash mob' atau aksi rasa kilas program Keretapi Sarong 2023 (KS2023) bertemakan etnik bagi menyemarakkan semangat patriotik dan perpaduan dalam kalangan rakyat sempena Hari Malaysia, Sabtu ini.

Program anjuran Local Companion (LOCCO), sebuah pertubuhan bukan kerajaan (NGO) itu ba-

kal menghadirkan sambutan unik dengan persembahan tarian tradisional, muzik dan seni penceritaan berbilang bangsa.

'Flash mob' berkumpulan Keretapi Sarong akan diadakan di pelbagai bandar dan stesen, antaranya Putrajaya Sentral (KLIA Transit), Subang Jaya (LRT), Bandar Utama (MRT), Ampang (LRT), Gombak (LRT), Kajang (MRT) dan KL Sentral (LRT).

Acara sama turut berlangsung serentak di bandar utama seperti Johor Baharu (sepanjang Sungai Segget), Ipoh (KTMB Ipoh) dan Kuala Terengganu (Kampung Budaya Terengganu) serta di London, United Kingdom (Battersea Power Station).

Program berkumpulan Keretapi Sarong adalah acara komuniti yang saban tahun diadakan bagi mengeratkan hubungan antara rakyat berbilang kaum di Mala-



Amir (empat dari kanan) dan Shamsul (tiga dari kiri) pada majlis perasmian Keretapi Sarong 2023 di Dataran Merdeka. (Foto Rohanis Shukri)

ysia, selain menggalakkan penggunaan pengangkutan awam, di samping memelihara dan merayakan kain sarung sebagai kepelbagaian warisan.

Program dapat sokongan

Pengarah KS2023, Shamsul Baharin Zainuzzaman, berkata program mendapat sokongan rakan kerjasama utama, iaitu Rapid KL, syarikat sistem pengangkutan awam dimiliki Prasarana Malaysia Berhad (PRASARANA) dan dioperasikan oleh anak syarikatnya, Rapid Rail dan Rapid Bus.

Katanya, KS2023 dianjurkan dengan kerjasama Kementerian Pelancongan, Seni dan Kebudayaan (MOTAC); Jabatan Kebudayaan dan Kesenian Negara (JKKN) serta Dewan Bandaraya Kuala Lum-

pur (DBKL).

"Kami sangat teruja untuk mengumumkan bahawa lokasi tahun ini adalah tempat paling ikonik dan bersejarah di negara ini, iaitu Dataran Merdeka. Pemilihan lokasi itu berikutan keluasan kawasan yang boleh dihadiri lebih ramai pengunjung.

"Pengunjung juga dapat menghadiri Festival Permainan Malaysia, anjuran JKKN yang berlangsung serentak," katanya memaklumkan program itu akan meramaikan detik bersejarah apabila rakyat berbilang bangsa berkumpul di Dataran Merdeka selepas perjalanan kereta api berlepas dari stesen terpilih.

"Memandangkan kita menjangkakan jumlah yang hadir lebih ramai tahun ini, kita meramalkan

'flash mob' dengan pakaian sarung dan etnik ini juga akan lebih meriah," katanya.

Sementara itu, Ketua Pegawai Eksekutif Rapid Rail, Amir Hamdan, berkata pihaknya menjangkakan lebih 10,000 peserta akan menggunakan rel Rapid KL dari tujuh stesen untuk ke lokasi akhir KS2023, meningkat berbanding lebih 6,000 peserta tahun lalu.

"Dengan acara komuniti seperti ini, saya berharap ia akan dapat menyemarakkan semangat patriotik dan perpaduan dalam kalangan rakyat Malaysia. Acara ini juga dapat menerapkan nilai sa- yangkan budaya dan menggalakkan warga belia terutamanya untuk lebih menghargai busana tradisional Malaysia," katanya.